

# *“Goccius po Santu Sidori”*

*Spanniolu ses Sidori  
Sagradas operas bantas,  
Montis e pranus incantas  
O messaiu protetori.*

*Nasciast in poboresa  
De domu candidu fillu  
Amurosu bonu fillu  
De bab'e mama bellèsa  
Portasta santa sajesa  
Di edadi e minori.*

*Montis e pranus incantas  
O messaiu protetori.*

*In su coru de sa Spannia  
Tui nascis madrilenu  
Po predica'in s'allenu  
Miragulas sa campannia  
Trigus e loris amannias  
Cun fidi e cun amori.*

*Montis e pranus incantas  
O messaiu protetori.*

*Mulleri de passientzia  
As tentu cumentu sposa  
Cun fillu tu' rispetosa  
Ti donat sa clementzia  
Cun issus pagu presentzias  
Po cunverti su peccadori.*

*Montis e pranus incantas  
O messaiu protetori.*

*Is bois lassast'arendi  
Cun s'anjulu a guida  
Predicas sa bona vida  
In dotrina spieghendi  
A sa genti tratenendi  
Cun esemplus de valori.*

*Montis e pranus incantas  
O messaiu protetori.*

*Po s'arregota t'imploru  
E m'acantzas su disiju  
Deu a tui mi strinju  
O Santu de bonu coru  
Axinas, spigas che s'oru  
Fais cresci o Sidori.*

*Montis e pranus incantas  
O messaiu protetori.*

*Rennias in artu tronu  
A tui sempr'invocaus  
E po proi ti pregaus  
Justu portentu patronu  
Sabiu donas su donu  
De Gesus mediadori.*

*Montis e pranus incantas  
O messaiu protetori.*

*In su coru ses sinnau  
De su Celesti Eternu  
Ses ornamentu amenu  
In su mundu nomenau  
Po gratzias chi as donau  
De bonu predicadori.*

*Montis e pranus incantas  
O messaiu protetori.*

*Cun sacra fidi dinnia  
Ses meda glorificau  
Cun meritus predicau  
Stima ti portant in Sinnia  
Totu s'intrea Sardinnia  
O santu agricoltori.*

*Montis e pranus incantas  
O messaiu protetori.*

